

I Colonos a àn inmaneat une schirie di events tra i plui interessants dai ultims agns, in onôr des vòs che a àn cjanât il dret e il stuart de anime dal Friûl.

» DI WALTER TOMADA



Calendari intrigant

Federico Rossi e Philippe Daverio ae edizion dal 2008

A son tantis lis vòs che a àn cjanât il dret e il stuart de anime dal Friûl, la lûs de sò bielece e il scûr dai siei paradòs. E vivis o muartis che a sedin, al è propit 'In onôr, in favôr' di chestis personalitâts che i Colonos a àn inmaneat un dai plui intrigants calendaris di Avostanis dai ultims agns.

CETANCJ APONTAMENTS...

Un program che al è partît cualchi zornade indaûr cuntun dopli omaç - filmic di **Remigio Romano**, fotografic di **Mario Dondero** - a **Pier Paolo Pasolini** e ai 'Turcs tal Friûl' senegjâts tal 1995 di **Elio De Capitani**. Tra Vilecjasse e Scluse invezeit si

è scoltade la version musicade di **Renato Miani** dai 'Amòrs' di **Pierluigi Cappello**, adatâts ae vòs di **Elsa Martin**.

Martars ai 11 al sarà il Teatro Incerto a presentâ la sò 'biografie autorizade' pai prins 33 agns di cariere dal trio **Fantini-Moretto-Scruzzi**; e vinaris ai 14 invezeit e sarà la Microband di **Luca Domenicali** e **Danilo Maggio** a fiestezâ culi il complean dai 30 agns. Lunis ai 17 serade cun **Maurizio Casagrande** e **Matteo Vercesi**, **Alberto Fasulo**, **Alessandra Kersevan** e **Aurelio Venuti**, **Carlo Marsich**, **Priscilla De Agostini**, **Christiane Rorato** e **Lino Straulino** par scuvierzi ce che al bol inte cite de culture furlane di vuê. In divignî a son doi

gnûfs films, incentrâts su Menocchio e i furlans da la Transiberiana: e rivarà in curt la stampant in 3D che e fevele furlan, intant che si inmanee la publicazion de 'Divine Comedie' dute par furlan, e e nas une gnove riviste leterarie.

... DI NO PIERDI

Di no pierdi joibe ai 20 la riedizion des cjançons dal Povolâr Ensemble di **Giorgio Ferigo** ideade di **Annalisa Comuzzi** e **Francesca Valente** pal adatement musicâl di **Mauro Costantini**. La sfide di tornâ a rangjâ lis canzons dal album 'Cjamp dai pierdûts amòrs' e je une vore interessante. E un altri grant inteletuâl lâit vie masse adore, **Franco Marchetta**, al sarà ricuardât martars ai 25 cu la leture seniche di 'La nebbia', il so ultim lavôr no finît. Tal mieç di chescj doi apuntaments, **Philippe Daverio** al tornarà domenie ai 23 ai Colonos par proponi la sò 'Sobrietât' come vision alternative a chê di Expo, manifestazion dominade des multinazionâls dal alimentâr.

Prin de 'Balade par Primo Carnera' di Luna e un Quarto e **Maurizio Mattiuzza** che e sierarà il cartelon musicâl ai 2 di setembar, al sarà spazi anche par un dopli omaç al grant vecjo de culture furlane: **Leo Zanier**, che al finis 80 agns. La presentazion dal libri 'Il dolore e la grazia' a Palaç Morpurgo e je fissade par joibe ai 27: e sabide ai 29 grande fieste ai Colonos pal unic vèr Patriarcje che al reste aes letaris furlanis.



ilfriuli@ilfriuli.it

■ NIE FURLAN PE RAI

Pal Senât di Rome la Lenghe no esist

Il furlan? Pal Senât de Republiche (chel che par ironie dal destin al varès di diventâ la Cjmare des Autonomiis) nol esist. Lu denuncie il president de Assemblee de Comunitât lenghistiche furlane **Diego Navarra**.

"Inte discussion de riforme de Rai si fevele di "trasmissions radiofonichis e televisivis in lenghe todescje e ladine pe Provincie autonome di Bolzan, in lenghe ladine par chê di Trent, in francês pe Val d'Aoste e in sloven pal Friûl-Vignesie Julie". Furlan e sart no son nomenâts: ma intant che i senatòrs sarts a àn sostignût trasversalmentri un emendamento pe lôr lenghe, dai nestris nissun si è inacuart. La jerino?" si domande Navarra. Il president de Assemblee al riferis anche che ae boçadure dal emendamento dai sarts in Sardegna si è jevade une proteste une vore fuarte de int e dai ambients politics. "Achì invezeit duç a tasin intant che si sta fasint une vere discriminazion a dam de nestre lenghe, in contrast cu la leç 482/99 che e sigure la sò tutele di bande dal servizi public radiotelevisif.

SCOLTADIS DI DRIUS

Il vèr siôr

El vèr siôr no l'è chel ch'a l'à tant ce mangjâ. A l'è chel ch'al rive a digjeri ben chel ch'al mangie.





SMS: 393 00 90700
diretta@radiofantasy.it
TEL. +39 0431 30022

la radio tra la gente

UDINE VENETO ORIENTALE	FM 90.700	GORIZIA	FM 89.100	PAULARO	FM 107.700
PORDENONE	FM 95.800	TRIESTE	FM 89.100	TOLMEZZO	FM 101.600

www.radiofantasy.it